



# AGAX ASOCIACIÓN GALEGA DE AXEDRECISTAS

C.I.F. G-15228844

Teléfonos:

www.agax.org - correo electrónico: correo@agax.org

Redes sociais: @xadrecistas

## Preámbulo:

A ASOCIACIÓN GALEGA DE AXEDRECISTAS (AGAX), celebrou a súa xuntanza fundacional o 16 de xuño de 1989, aprobando as normas que gobernaron dende entón esta entidade. O 21 de setembro de 2012 foron realizados os primeiros cambios e finalmente na Asemblea do 31 de agosto de 2025 engadíronse os últimos cambios relativos ao cambio de domicilio social e creación da sección deportiva de xadrez.

## Estatutos da ASOCIACIÓN GALEGA DE AXEDRECISTAS (AGAX)

### CAPÍTULO I

#### DA ASOCIACIÓN EN XERAL

##### Artigo 1º

**1.1.** Procédese a adapta-los estatutos da asociación denominada ASOCIACIÓN GALEGA DE AXEDRECISTAS (AGAX) con número de inscrición realizado o 1 de setembro de 1989 no Rexistro do Ministerio de Interior 88.357 de asociacións sen ánimo de lucro, número 2012/016935-1 no Rexistro de Asociacións da Xunta e CIF G-15228844.

**1.2.** A asociación rexerase polos devanditos estatutos, pola Lei orgánica 1/2002, do 22 de marzo, reguladora do dereito de asociacións e pola demais lexislación existente en materia de asociacións que lle sexa aplicable.

**1.3.** Poderá empregar as denominacións "Asociación Galega de Xadrecistas" e "Asociación Gallega de Ajedrecistas" en función do idioma e sen prexuízo do seu nome histórico e oficial, que será o empregado nas relacións coa administración e documentación formal.

##### Artigo 2º

O domicilio principal e permanente da ASOCIACIÓN GALEGA DE AXEDRECISTAS (AGAX) radicará na localidade da Coruña, na rúa Solís número 19 terceiro C, CP 15009, A CORUÑA.

Outros datos de contacto aparecen na cabeceira da presente folla.

##### Artigo 3º

A asociación en funcións dos seus fins e do emprazamento do seu domicilio social, exercerá fundamentalmente as súas actividades no ámbito territorial de Galicia.

##### Artigo 4º.

**4.1.** A asociación constitúese por tempo indefinido e só se disolverá, conforme o disposto nestes estatutos e pola vontade das persoas asociadas expresada en Asemblea Xeral Extraordinaria convocada ao efecto ou ben polas causas previstas na lexislación vixente.

**4.2.** A ASOCIACIÓN GALEGA DE AXEDRECISTAS (AGAX) rexerase segundo os principios democráticos contidos no marco da Constitución e o resto do ordenamento xurídico.

## **Artigo 5º**

**5.1.** A ASOCIACIÓN GALEGA DE AXEDRECISTAS (AGAX) ten como fin principal proporcionar a súa masa social e simpatizantes, actividades culturais, deportivas, científicas e recreativas, tendo como base o xadrez. O xadrez non será o único campo de actuación, aínda que si o principal e o que xustifique o resto de actividades, para o que se coordinará con diferentes entidades culturais e/ou deportivas.

**5.2.** Para cumprir o seu obxectivo a ASOCIACIÓN GALEGA DE AXEDRECISTAS (AGAX) levará a termo unha gran variedade de actividades; torneos, cursos, certames, becas de apoio a investigadores, publicacións, etc. co fin de afondar na promoción do xadrez en Galicia, incluíndo nestas accións a creación de novas entidades.

Para mellor funcionamento da parte deportiva créase unha sección deportiva de xadrez, que cumprirá cos requisitos establecidos na Lei 3/2012, do 2 de abril, do deporte de Galicia e a súa normativa de desenvolvemento. O ámbito da sección deportiva será autonómico.

**5.3.** Os ingresos que se obteñan por calquera concepto destinaranse exclusivamente ao cumprimento destes fins, sen que se poidan repartir entre os asociados nin outras persoas físicas ou xurídicas con interese lucrativo.

---

## **CAPÍTULO II**

### **DAS PERSOAS ASOCIADAS**

## **Artigo 6º**

**6.1.** Poderán ser integrantes da ASOCIACIÓN GALEGA DE AXEDRECISTAS (AGAX) todas aquelas persoas físicas, con plena capacidade de obrar e as persoas xurídicas tralo acordo do seu órgano competente, que non teñan débedas pendentes coa asociación e que reciban a aprobación dos órganos de goberno da ASOCIACIÓN GALEGA DE AXEDRECISTAS (AGAX) do xeito determinado nestes estatutos.

**6.2.** A entidade contará cunha sección xuvenil, na que se incluírán as persoas físicas que teñan os 14 anos cumpridos e os 30 sen cumprir.

**6.3.** Os acordos de admisión de membros serán tomados polo órgano correspondente segundo queda determinado nestes estatutos.

## **Artigo 7º**

Dentro da asociación poderán existilas seguintes clases de persoas socias:

**Fundador/a;** aquelas persoas que subscribiron a acta fundacional.

**De Número;** aquelas persoas que ingresaron con posterioridade á subscrición da acta fundacional e que leven mais de dous anos consecutivos de asociados, sendo admitidos pola Asemblea Xeral a proposta da Xunta Directiva.

**Colaborador/a;** aquelas persoas que ingresaron con posterioridade á subscrición da acta fundacional e non reúnan as condicións dos socios de número.

**De Honra;** aquelas persoas que, a xuízo da Asemblea Xeral, e a proposta da Presidencia, tiveran axudado de xeito notable ao desenvolvemento dos fins da asociación poderán ser sinaladas como socios ou directivos de honra.

**Xuvenil;** aquelas persoas menores físicas que teñan os 14 anos cumpridos e os 30 sen cumprir, sen prexuízo dos maiores de 18 anos que pasarán á ser socios colaboradores, ou de número se levan dous anos continuos como socios e así o determina a Asemblea Xeral.

## **Artigo 8º**

**8.1.** A condición de persoa asociada pérdese:

- a) Por vontade propia.
- b) Por falta de pago da cota anual.

c) Por incumprimento das súas obrigas ou a realización de accións que prexudiquen gravemente aos intereses da ASOCIACIÓN GALEGA DE AXEDRECISTAS (AGAX), previo expediente disciplinario, con audiencia da persoa interesada.

d) Por falecemento da persoa física ou extinción da persoa xurídica.

e) No caso de membros de honra, polo acordo da Asemblea Xeral, que non poderá ser recorrido.

**8.2.** A expulsión de membros no suposto do apartado b) do parágrafo anterior, será acordada pola Xunta Directiva, logo de citar en audiencia á persoa interesada. O acordo de expulsión deberá ser ratificado pola Asemblea Xeral Extraordinaria e contra a súa resolución poderase recorrer ante a xurisdición ordinaria.

## **Artigo 9º**

**9.1.** As persoas asociadas á ASOCIACIÓN GALEGA DE AXEDRECISTAS (AGAX) teñen os seguintes dereitos:

1. Participar nas actividades da asociación e nos órganos de goberno e representación, exerce-lo dereito de voto, así como asistir á Asemblea xeral, de acordo cos estatutos.

2. Recibir información da composición dos órganos de goberno e representación da asociación, do seu estado de contas e do desenvolvemento da súa actividade.

3. Ser oído con carácter previo á adopción de medidas disciplinarias que lle afecten e ser informado dos feitos que dean lugar ás ditas medidas, debendo motivarse o acordo que, no seu caso, imponha a sanción.

4. Impugna-los acordos dos órganos da asociación que estime contrarios á lei ou aos estatutos.

**9.2.** As persoas asociadas colaboradoras, de honra e xuvenís non intervirán na dirección da asociación nin nos órganos de representación dela. Estarán, sen embargo, todos eles facultados para asistir ás asembleas xerais con voz, pero sen voto.

## **Artigo 10º**

Son obrigas das persoas asociadas á ASOCIACIÓN GALEGA DE AXEDRECISTAS (AGAX):

1. Comparti-las finalidades da asociación e colaborar para a súa consecución.

2. Paga-la cotas que se establezan, salvo no caso dos socios de honra que estarán exentos.

3. Desempeña-los cargos para os que foran elixidas.

4. Acatar e cumpri-los acordos validamente adoptados polos órganos de goberno e representación da asociación.

5. Acata-lo contido dos estatutos.

6. Ter unha boa conducta individual e cívica.

---

## **CAPÍTULO III**

### **DOS ÓRGANOS DA ASOCIACIÓN**

## **Artigo 11º**

A dirección e administración da asociación serán exercidas pola Presidencia, a Xunta Directiva e a Asemblea Xeral.

## **Artigo 12º**

**12.1.** A presidencia da asociación será desempeñada pola persoa designada pola Asemblea Xeral entre os seus membros e o seu mandato durará 4 anos. Contará como asistencia e substitución nas súas funcións por unha vicepresidencia, para casos de vacante, ausencia ou enfermidade.

**12.2.** A presidencia terá as seguintes atribucións:

a) Representa-la asociación diante de calquera organismo público ou privado.

- b) Convocar e presidi-las sesións que celebre a Xunta Directiva; presidi-las sesións da Asemblea Xeral; dirixi-las deliberacións dunha e outra, non tendo voto nas mesmas, salvo o de calidade, en caso de empate.
- c) Executa-los acordos adoptados pola Xunta Directiva e a Asemblea Xeral.
- d) Ordena-los pagamentos acordados validamente.
- e) Asina-las actas, certificados, pagos e outros documentos da asociación xunto ca persoa que ocupe a secretaría ou membro da Xunta Directiva a quen lle corresponda a elaboración do documento de que se trate.

### **Artigo 13º**

**13.1.** A Xunta Directiva estará formada polos seguintes postos; presidencia, vicepresidencia, secretaría, tesouraría e as vogalías que se considere oportuno.

**13.2.** Os cargos que compoñen a Xunta Directiva serán desempeñados de forma gratuíta, sen prexuízo do dereito a ser reembolsados dos gastos debidamente xustificadas en que poidan incurrir por actuacións relacionadas coa exercicio do seu cargo. As persoas elixidas para a Xunta Directiva deberán carecer de interese económico nos resultados da actividade levada a cabo pola asociación.

Poderán percibir retribucións por actuacións alleas ás súas funcións como directivos, especialmente en funcións de arbitraje e docencia nos programas deportivos organizadas total ou parcialmente pola entidade.

**13.3.** A Asemblea Xeral é a competente para elixi-los cargos da Xunta Directiva. A súa duración será igual que o mandato da persoa que sexa escollida para a presidencia, cesando coa mesma, aínda que todos poden ser obxecto de reelección indefinidamente.

**13.4.** Os cargos cesarán na súa función por:

- a) falecemento da persoa física ou extinción da persoa xurídica.

- b) renuncia voluntaria.

- c) transcurso do prazo para o que foron elixidos.

- d) acordo de cesamento de toda a Xunta Directiva adoptado por 2/3 das persoas asociadas reunidos en Asemblea Xeral Extraordinaria convocada para tal efecto.

A renuncia e o transcurso do prazo non dan lugar ao cese automático, senón que se deberá facer un efectivo traspaso de poderes con entrega de documentación e posta ao día do sucesor.

As vacantes que se puideran producir durante o mandato de calquera dos membros da Xunta Directiva, serán cubertas provisoriamente polas persoas que designen dende a presidencia ata a confirmación pola Asemblea Xeral. En calquera caso, a Xunta Directiva debe estar integrada como mínimo por 3 persoas, que exercerán as funcións de presidencia, secretaría e tesouraría.

### **Artigo 14º**

A Xunta Directiva terá as seguintes atribucións:

1. Programar e dirixi-las actividades asociativas.
2. Leva-la xestión administrativa e económica da asociación.
3. Someter á aprobación da Asemblea Xeral o orzamento anual de ingresos e gastos, así como o estado de contas do ano anterior.
4. Convocar e fixa-la data da Asemblea Xeral.
5. Propoñer á Asemblea Xeral a fixación de cotas ordinarias e extraordinarias para os asociados.
6. Designa-las comisións de traballo ou seccións que se estimen oportunas para o bo funcionamento da asociación.
7. Ditar normas interiores de organización e exercer cantas funcións non estean expresamente asignadas á Asemblea Xeral.
8. Resolver sobre as solicitudes de ingreso de novos asociados.
9. Propoñe-lo plan de actividades da asociación á Asemblea Xeral para a súa aprobación, impulsando e dirixindo as súas tarefas.

10. Resolve-los procedementos disciplinarios que se instrúan.
11. Aquelas que non veñan atribuídas expresamente á outro órgano da asociación.

### **Artigo 15º**

**15.1.** A Xunta Directiva será convocada pola presidencia, a iniciativa propia ou a petición de calquera membro.

**15.2.** Para que os acordos da Xunta Directiva sexan válidos, deberán ser adoptados pola maioría de votos das persoas asistentes, sendo necesaria a concorrencia, polo menos, da metade máis un dos seus membros e, en todo caso, da presidencia ou vicepresidencia e a persoa que ocupe a secretaría ou que a substitúa.

**15.3.** A secretaría será responsable de levanta acta das sesións, que se transcribirá ao libro de actas.

### **Artigo 16º**

Os cargos da Xunta Directiva presidirán as comisións que a propia Xunta acorde constituír, co fin de delegar nelas a preparación de determinados actos ou actividades, ou de acadar delas as informacións necesarias. Formarán parte das ditas comisións o número de persoas asociadas que acorde a Xunta Directiva, a proposta das persoas responsables.

### **Artigo 17º**

A Asemblea Xeral é o órgano de expresión da vontade da asociación e estará formada polas persoas asociadas con dereito a voto. As persoas que ocupen a presidencia e a secretaría da asemblea serán as mesmas que na Xunta Directiva.

### **Artigo 18º**

A Asemblea Xeral da ASOCIACIÓN GALEGA DE AXEDRECISTAS (AGAX) reunirse con carácter ordinario como mínimo unha vez ao ano, e con carácter extraordinario cantas veces o acorde a Xunta Directiva, ou o soliciten o 10% das persoas asociadas. Neste último caso realizarase por medio de escrito dirixido á presidencia, coas sinaturas solicitantes, no que se expoña o motivo da convocatoria e a orde do día.

### **Artigo 19º**

A Asemblea Xeral Ordinaria reunirse necesariamente no período que vai desde o mes de febreiro ata o de maio. Tanto a Asemblea Ordinaria como a Extraordinaria serán convocadas con 15 días de antelación pola presidencia.

A notificación farase pública nos órganos de difusión da ASOCIACIÓN GALEGA DE AXEDRECISTAS (AGAX) e tamén mediante correo aos socios.

### **Artigo 20º**

Serán competencias da Asemblea Xeral Ordinaria:

1. Aproba-lo plan de actividades.
2. Examinar e aproba-las contas e balances do exercicio anterior.
3. Aproba-los presupostos de ingresos e gastos para cada exercicio.
4. Exame e aprobación das cotas.

### **Artigo 21º**

Serán competencias da Asemblea Xeral Extraordinaria:

1. Modifica-los estatutos da asociación.
2. Elixir e cesar ás persoas escollidas para a Xunta Directiva.
3. Aproba-la federación con outras asociacións.
4. Autoriza-lo alleamento, gravame ou hipoteca de bens sociais.
5. Acorda-la disolución da asociación.
6. Designación das persoas que van encargarse da liquidación.
7. Ratifica-la expulsión de persoas asociadas a proposta da Xunta Directiva.
8. Solicita-la declaración de utilidade pública da asociación.

9. Aproba-lo regulamento de réxime interno da asociación.

10. As que sendo de competencia da asemblea ordinaria, por razóns de urxencia ou necesidade, non poidan espera-la súa convocatoria, sen grave prexuízo para a asociación.

11. Tódalas competencias non conferidas expresamente á Asemblea Xeral Ordinaria ou á Xunta Directiva.

### **Artigo 22º**

A Asemblea Xeral da ASOCIACIÓN GALEGA DE AXEDRECISTAS (AGAX) quedará validamente constituída sempre que concorran a metade máis un dos seus membros na primeira convocatoria ou transcorrida media hora en segunda convocatoria, con calquera número de asistentes pero, en todo caso, coa asistencia das persoas que ocupen a presidencia e a secretaría ou persoas que os substitúan.

### **Artigo 23º**

Os acordos adoptados deberán selo polo voto afirmativo da maioría simple das persoas asociadas asistentes ou representadas, excepto os relativos os apartados 1 ao 9 do artigo 21º, que requirirán maioría de dous terzos. A continuación levaranse os acordos ao libro de actas e asinarán as persoas que exerzan a presidencia e secretaría da asemblea. A acta deberá ser lida na seguinte sesión celebrada pola Asemblea Xeral e aprobada por maioría dos presentes.

### **Artigo 24º**

Os acordos adoptados conforme os preceptos anteriores obrigarán a tódalas persoas asociadas, incluso ás non asistentes.

As sesións abranse cando así o determine a presidencia. Seguidamente procederase por parte da secretaría á lectura da acta da Asemblea anterior que deberá ser aprobada.

Posteriormente a secretaría procederá a presentar a orde do día. Cada punto será informado polo cargo da Xunta Directiva que lle corresponda, procedéndose ao debate e a aprobación dos correspondentes acordos nos termos contidos nestes estatutos, segundo a materia de que se trate.

### **Artigo 25º**

Os acordos que vaian contra estes estatutos ou infrinxan os fins da asociación poderán ser recorridos en reposición diante da Asemblea Xeral. A partir da resolución do recurso de reposición, quedará expedita a vía para recorrer perante a xurisdición ordinaria

### **Artigo 26º**

**26.1.** A secretaría recibirá e tramitará as solicitudes de ingreso, levará o ficheiro e o libro rexistro de asociados e terá ao seu cargo a dirección dos traballos administrativos da entidade. Correspóndelle así mesmo notifica-las convocatorias e custodia-las actas e expedir certificacións desta co visto e praxe da presidencia.

**26.2.** Nos casos de ausencia, vacante ou enfermidade da persoa que ocupe a secretaría, a presidencia designará entre o resto da Xunta Directiva a persoa desenvolverá esta función.

### **Artigo 27º**

**27.1.** A tesouraría recadará e custodiará os fondos pertencentes á asociación, dará cumprimento ás ordes de pagamento que expida a presidencia, levará a contabilidade da asociación, tomará razón e levará conta dos ingresos e dos gastos asociativos, elaborará o borrador de orzamentos da asociación así como as contas de resultados e balances. Tamén levará o inventario dos bens da asociación nun libro establecido para este efecto.

**27.2.** A tesouraría ten a obriga de proceder ao peche do exercicio orzamentario de xeito tal que permita que as contas estean a disposición das persoas asociadas nos quince días anteriores á celebración da Asemblea Ordinaria.

### **Artigo 28º**

As vogalías terán as seguintes atribucións:

1. Realizar programas e propostas na súa área de actuación.
2. Desempeña-los traballos que lle sexan encomendados pola Xunta Directiva.

---

## CAPÍTULO IV

### RÉXIME ECONÓMICO

#### **Artigo 29º**

A asociación foi fundada sen dispor de patrimonio propio. O peche do exercicio económico coincidirá co do ano natural.

#### **Artigo 30º**

A asociación funcionará en réxime de presuposto anual, con partidas diferenciadas de ingresos e gastos. O borrador de presuposto será elaborado pola tesouraría da asociación, que deberá de telo preparado antes do un de xaneiro de cada ano, co fin de que poida ser aprobado na Asemblea Xeral Ordinaria.

#### **Artigo 31º**

A asociación manterase dos seguintes recursos:

1. As cotas periódicas das persoas asociadas.
2. As cotas extraordinarias que propoña a Xunta Directiva e sexan aprobadas pola Asemblea.
3. As doazóns ou subvencións que poidan conceder órganos públicos, entidades privadas ou particulares.
4. Os ingresos que se poidan recibir polo desenvolvemento das actividades da asociación.
5. Calquera outro ingreso admitido pola normativa vixente para actividades non lucrativas.

#### **Artigo 32º**

A Asemblea Xeral Ordinaria, a proposta da Xunta Directiva, aprobará tanto as cotas ordinarias como as extraordinarias que non serán reintegrables en ningún caso. O recadado dedicarase a atende-las necesidades da asociación.

#### **Artigo 33º**

Anualmente con referencia ao último día do exercicio económico de cada ano, elaboraranse as contas, que se formalizarán nunha memoria, que será posta a disposición das persoas asociadas, durante un prazo non inferior a 15 días ao sinalado para a celebración da Asemblea Xeral Ordinaria, que deberá aprobalas ou censuralas.

#### **Artigo 34º**

Para a disposición de fondos das contas que a asociación ten nas entidades bancarias será necesaria a sinatura conxunta do presidente e do tesoureiro.

#### **Artigo 35º**

Como entidade sen ánimo de lucro, en ningún caso poderán ser distribuídos entre as persoas asociadas os recursos obtidos pola asociación.

---

## CAPÍTULO V

### DO REGULAMENTO DE RÉXIME INTERNO

#### **Artigo 36º**

O regulamento de réxime interno, no seu caso, desenvolverá aquelas materias non contempladas directamente nos presentes estatutos, como o procedemento de elección dos membros da Xunta Directiva e o procedemento disciplinario, non podendo ir en ningún caso

en contra do estipulado neles. En todo caso, o funcionamento interno da asociación estará sometido ao ordenamento xurisdiccional civil.

---

## CAPÍTULO VI

### MODIFICACIÓN DE ESTATUTOS E DISOLUCIÓN DA ASOCIACIÓN

#### **Artigo 37º**

Os presentes estatutos só poderán ser modificados por acordo da Asemblea Xeral Extraordinaria convocada para tal efecto, adoptado polas 2/3 partes das persoas asociadas. A proposta de convocatoria deberá ir acompañada do texto das modificacións propostas.

#### **Artigo 38º**

A asociación disolverase voluntariamente por acordo das persoas socias adoptado pola unanimidade das asistentes á Asemblea Xeral Extraordinaria convocada para tal efecto.

#### **Artigo 39º**

Acordada a disolución, a Asemblea Xeral extraordinaria designará tres persoas que farán a liquidación, que xunto a presidencia e a tesouraría, procederán a efectuar a liquidación dos bens, pagando débedas, cobrando créditos e fixando o haber líquido resultante.

#### **Artigo 40º**

O haber resultante unha vez efectuada a liquidación, doarase a Federación de asociacións e Entidades Culturais e Deportivas de Galicia, CIF G15310188. O xustificante da doazón será presentado no Rexistro de Asociacións correspondente para proceder á inscrición da disolución da asociación.

---

## DILIXENCIA FINAL

**Manuel Andión Muínelo**, na súa calidade de secretario da ASOCIACIÓN GALEGA DE AXEDRECISTAS (AGAX) fai constar que estes estatutos modificados en Asemblea Xeral Extraordinaria celebrada o 31 de agosto de 2025, sono para cumprir cos requisitos establecidos na disposición transitoria primeira da Lei orgánica 1/2002, de 22 de marzo, reguladora do dereito de asociación.

Na Coruña, a 02 de setembro de 2025